



Comunicado di Prensa

26 di april 2021

Investigacion di hecho: no tin violacion di integridad na Secretariado di Cft, pero si descuido

Willemstad – A raiz di e denuncianan anonimo haci na Colegio di supervision financiero, a efectua un investigacion independiente riba encargo di su presidente, Sr. Raymond Gradus. A yega na e conclusion cu no tabatin violacion di integridad ni comportamiento excesivo; loke si a constata ta problema di descuido. Ta necesario pa implementa den Secretariado di Cft mehoracion den e organisacion administrativo y formulacion mas cla di e proceduranan interno. E denuncianan anonimo, cu a haci na cuminsamento di e añ aki, tabata concerni acusacion contra e Secretariado di e tres Kolegionan. E agencia independiente EBBEN Partners a efectua e investigacion di hecho.

Gradus: "Aunke a haci e denuncianan di forma anonimo, mi a considera cu tabata mi responsabilidad pa tuma e acusacionnan ey na serio y percura pa un organismo independiente investiga nan mas pronto posibel. Esey a tuma luga caba y nos a ricibi e relato di e investigacion."

Gradus ta sigui: "A pesar cu, a base di e investigacion, no a constata violacion di integridad ni comportamiento excesivo, si ta sali na cla e necesidad di implementa den termino general mehoracion den e organisacion administrativo y di formula mas cla e proceduranan interno."

Gradus ta señala cu a raiz di e conclusionnan di e investigacion di hecho a tuma diferente decision. Asina, por ehempel, lo formula mas cla e proceduranan rond di tumamento na trabou di personal temporal y di biahamento pa exterior, y den futuro lo no duna gratificacion den natura mas. Ademas, lo elabora e maneho di gratificacion, Presidente lo aprob'e y Secretario lo aplic'e.

Tambe riba un otro tereno lo introduci un coreccion. Esta, te y cu december 2019 tabata paga anualmente un gratificacion di Pasco di ANG 1.000 netto na tur empleado di Secretariado. Pa e personal local tabata converti e gratificacion ey na un suma bruto. A keda sin realisa e adaptacion administrativo ey pa e personal cu a bin djafo. Awor lo consulta cu Ministerio di Asunto Interno y Relacion den Reino pa determina con por realisa ainda e hacimento bruto pa e empleadonan ey. Cu un auditoria lo comproba mas despues cu a cumpli corectamente cu e procedura di administracion di salario.

Gradus: "Resumiendo: Cft tin un funcion ehemplar. Ta importante pa tur hende na Cft muestra un comportamiento di integridad total. A start un trayecto pa sigui aumenta e consenshi di integridad den e organisacion cu yudansa di un persona confidencial."

[Fin di e Comunicado di Prensa]

Potret:

Salt & Vinager

Texto na e potret:

Segun Presidente di e Colegionan di supervision financiero, Raymond Gradus, e investigacion di hecho no a revela violacion di integridad ni comportamiento excesivo na Secretariado di e Colegionan. Loke si a constata ta problema di descuido.



Nota pa redaccion – no pa publicacion

Contacto na Cft:

Secretariado di e Colegionan di supervision financiero
Telefon (+5999) 461-9081 / (+5999) 461-9082 / (+5999) 461-9084
Email info@cft.cw
Website www.cft.cw

Persona di contacto cu Prensa:

Jefka Martina
Telefon (+5999) 512-6861